

# Rau To Paulus Imbooda Ila To Yes Galesia

## Galesia

---

### Maaron tau to ighur Paulus pa uraat toni

**1** <sup>1</sup>You Paulus, mbaŋooŋa to Yesu Kresi, to nambood rau tonene. Uraat to naghamaŋami ne, tamtoŋhon eta ighur ghou pani maau, ve lupuuŋ eta to taan tighur ghou pani maau. Maau kat. Yesu Kresi ve Tama Maaron to ipamundigini pa mateeŋ, yesuru to tighur ghou pa uraat tonene.<sup>a</sup>

<sup>2</sup>Toŋvetaz tisob to Kresi to tineep toman ghou ne, yeiŋa nimbood rau tonene ilat to yam tamtoŋhon to aneep ila lupuuŋ to Kresi irau taan suruvu to Galesia.<sup>b</sup>

<sup>3</sup>Poia to Tamaan Maaron ve Tiina toit Yesu Kresi iza tiam, ve tiŋgin gham aneep pooi toman lolomim luuma. Onoon. <sup>4</sup>Kresi iyokia tau ve imaat itaŋhon Tamaan Maaron lolo, lesu ireu sosor toit, ve ipas ghiit tavot pa samia tapiri to aazne ineeep irau taan.<sup>c</sup>

<sup>5</sup>Tovenen tapait Maaron iza pa tapiri ve poia toni to aazne, ve itaŋhoni taghoni gha ila. Onoon.

### Varu poia ee moghon inepneep

<sup>6-7</sup>Oyai, you naghamaŋ ŋgar naol pa yam Galesia. Aghita. Ila uraat to Yesu Kresi ve poia toni, Maaron ipoi gham anim le wa. Eemoghon yam rikia moghon apul murimim pani, ve aghaze ataghon varu poia ite. Ve varu poia ee moghon to inepneep. Ite paam maau. Alooŋ. Tamtoŋhon pida to tinepneep toman gham, yes titortoor varu poia to Kresi ve tighamun ŋgar tiam. Ndiran tonowen, saveeŋ todi iyel kat.<sup>d</sup>

<sup>8</sup>Tovenen yam alooŋ di malep. Alooŋ. Ighaze tamtoŋhon eta, ma aŋela eta to sambam ivotia varu poia payam, ve saveeŋ toni iyel pa varu poia

---

**a** 1:1 Mbaŋ 9:15   **b** 1:2 Mbaŋ 16:1-6, 18:23   **c** 1:4 Mk 10:45   **d** 1:6-7 Mbaŋ 15:1,24; 2Kor 11:3+

to muun yei nivotia payam, nene pale mbalmbali to Maaron iza toni ve iwaghamuni. Yei paam, ighaze nigham tovene, nene pale mbalmbali to Maaron iza tiei ve iwaghamun ghei. <sup>9</sup>Tovenen saveeņ to nisavia ve alooņa wa, tauto aazne nayoli muul. Ighaze tamtoghon eta ivotia saveeņ payam, ve saveeņ toni iyel pa varu poia to muun yam aghami, nene pale mbalmbali to Maaron iza toni ve iwaghamuni.<sup>e</sup>

<sup>10</sup>Yam agham ŋgar vena? Saveeņ tiou tonene, you nasavia pa naghām tamtoghon lolodi poia payou? Maau. You nasavia leso Maaron lolo poia payou. Ve vena? Yam aghaze you nazuaria ghou pa ghamuun tamtoghon lolodi? Maau kat! Ighaze naghām tovene, nene you mbesooņa to Krisi maau.<sup>f</sup>

### **Yesu Krisi tau to ipaghazoņan Paulus pa varu poia**

<sup>11</sup>Yam toņvetaz, you naghaze yam awatag kat tovene: Varu poia to you nasavia payam, nene ivot ila to tamtoghon eta to taan maau. <sup>12</sup>Pasa, you naghāmi ila to tamtoghon eta maau. Ve tamtoghon eta ipatoot ghou pani maau. Yesu Krisi tau, to ivotia payou.<sup>g</sup>

### **Paulus ipaesia ataam to ye itoor ŋgar toni, ve Yesu Krisi ighuri inim mbaņooņa toni**

<sup>13</sup>Ŋgar to muun naghāmghami, yam avaat alooņa wa. Sawa to nataghon yes Yuda pa tutuun ve suņuun todi, naghur patāņani tintina izaza to yes to tineep ila lupuun to Maaron, ve naghām di tineep sami kat. Pasa, naghaze le nareu di, ve napasob lupuun todi le isob kat.<sup>h</sup>

<sup>14</sup>Sawa tonenen, you nazuaria ghou kat pa suņuun ve tutuun to yei Yuda, le nalib pa nditag naol to yeiņa tubuun ee moghon. Pasa, ŋgar tiou iyaryaņ kat naghaze le nataghon katin tutuun tisob to nditimbug to tineep muun ve inim.<sup>i</sup>

<sup>15-16</sup>Eemoghon, sawa to tinaņ ipoop ghou sone, Maaron isia ghou pataghaņ wa. Ve muri ghorō, ye ipoi ghou nanim le, itaghon tau lolo ve poia toni, ve ipatooņ Natu payou, leso navotia varu pa yes to Yuda maau ne. Sawa to mbeb tonenen ivot payou, you nala nakaal ŋgeu eta to taan pa ipaghazoņan ŋgar tiou ne maau.<sup>j</sup>

<sup>17</sup>Ve nazala Yerusalem pa naghita yes to timuun payou ve tinim mbaņooņa to Krisi ne maau. Malmalig nala naneep izi taan suruvu to Arabia. Naneep mala ris le isob, ghorō namuul nala pa ndug Damaskus.

<sup>18</sup>Ndaman tol isob, ghorō nazala Yerusalem ve naghita Petrus, ve yeru nineep irau mboņ saņgul ve liim.<sup>k</sup>

---

e 1:9 Syg 22:18+ f 1:10 1Tes 2:4; Yems 4:4 g 1:12 1Kor 11:23; Ep 3:3  
h 1:13 Mbaņ 8:3, 26:9+; 1Tim 1:13 i 1:14 Mbaņ 22:3; Pil 3:6 j 1:15-16 Yer 1:5;  
Mbaņ 9:15; Ro 1:1 k 1:18 Mbaņ 9:26+

<sup>19</sup>Sawa tonenen, you naghita mbaŋooŋa pida to Krisi maau. Naghita Yakobus to Tiina toit tazi ne moghon.<sup>l</sup>

<sup>20</sup>Saveeŋ to nambooda payam ne, kaarom maau. Ila Maaron mata, nene saveeŋ onoon.

<sup>21</sup>You naghita Petrus le isob, ghorō nala naneep izi taan suruvu to Siria ve Silisia.<sup>m</sup>

<sup>22</sup>Sawa tonenen, lupuuŋ to Krisi to tineep irau taan suruvu to Yudea, tighita naghog maau. <sup>23</sup>Tilonŋooŋ varug moghon tovene: “Ŋgeu to muuŋ ighurghur pataŋani pa iit tamtoghon to taghur ila Krisi saveeŋ toni, ve ireureu ghiit, tauto aazne ivovotia saveeŋ tonenen pa tamtoghon.”

<sup>24</sup>Tovenen yes tilooŋ varug pa ŋgar to Maaron igham payou, ve tipait izi pa tapiri ve poia toni.

### Yes mbaŋooŋa to tineep izi Yerusalem tiyok pa uraat to Paulus

**2** <sup>1</sup>Ndaman saangul ve paan isob, ghorō yeru Banabas nizala muul pa Yerusalem. Sawa tonenen, naghām Titus ve yeiŋa nila.<sup>n</sup>

<sup>2</sup>Nazala sorok maau. Nataghon ŋgar to Maaron ivotia payou, tauto nazala. Nila peria, ghorō yeiŋa yes to tamtoghon tighita di tighaze yes tinim daba pa lupuuŋ to Krisi, nila nilup ghei sagan, ve napaes padi pa varu poia to navovotia pa yes to Yuda maau ne. Pasa, namatughez: Ighaze muri timundig ve tiyou avodi pa uraat tiou, nene pale uraat to naghāmghami, ighur anoŋa maau.

<sup>3</sup>Ve aghita. Titus to yeiŋa nizala, ye Yuda maau. Ye Grik taamdi. Eemoghon yes daba tonowen tizoorn dug pani pa tiziri maau.<sup>o</sup>

<sup>4</sup>Sawa tonenen, tamtoghon pida to toŋvetaz tau to Krisi maau, tigham kaarom ve tinim toman ghei sorok pa tindaŋgat ghei. Pasa, yes tiwatag: Yei nighur ila nighaze iit tamtoghon to taneep tuŋia ila to Krisi, Krisi ipas ghiit pa ataam to taghoniŋ tutuuŋ wa.<sup>p</sup>

Ndiran tonowen tighaze tigham ghei ninim mbesooŋa sorok muul pa yes Yuda gabuadi ve tutuuŋ todi.<sup>q</sup>

<sup>5</sup>Eemoghon yei niyoon ariana, ve nilooŋ aliŋadi rita maau. Pasa, nighaze le saveeŋ onoon to varu poia ineep deŋia pa yam to Yuda maau.

<sup>6</sup>Tovenen you napaesia varu poia to navovotia ne pa yes daba to tiŋgin lupuuŋ to Krisi, ve tiyok pani moghon. Tirere pani maau, ve tiseeŋga pa saveeŋ ite paam maau. Maau kat. Daba tonowen, tamtoghon titandag padi tighaze izadi tintina. Ve ighaze izadi tintina,

---

l 1:19 Mt 13:55 m 1:21 Mbaŋ 9:30 n 2:1 Mbaŋ 11:27+, 15:1+ o 2:3 Mbaŋ 16:3  
p 2:4 Ndiran to titaghon ataam to tutuuŋ, ŋgar todi tovene. Ighaze titaghon katin tutuuŋ  
tisob to Maaron, nene pale tineep deŋiadi ila mata. Ve ighaze tiyel pa tutuuŋ toni rita,  
nene irau tineep deŋiadi ila mata maau. q 2:4 Mbaŋ 15:24; Pil 3:2+

ma ledi izadi maau, nene you naghama ngar pa mbab tovene maau. Pasa, Maaron paam igham ngar pa tamtothon izadi maau.<sup>r</sup>

<sup>7</sup>Yes daba tonenen tighilal ghou tighaze Maaron inumeer ghou, ve ighur uraat inim nimag ighaze navotia varu poia pa yes to Yuda maau ne, raraate inimale ighur uraat to votiaa varu poia pa yes Yuda ila Petrus nima.<sup>s</sup>

<sup>8</sup>Pasa, Maaron ighur ghou nanim mbaŋoŋa pa yes to Yuda maau ne, ve ipapalot ghou pa uraat to naghama ghami ila lolodi, raraate inimale ighur Petrus inim mbaŋoŋa pa yes Yuda, ve ipapaloti pa uraat to ighama ghami ila lolodi. <sup>9</sup>Tovenen Yakobus, Petrus, ve Yoan, to tamtothon tighita di tighaze timuŋmuŋ pa uraat to Krisi, yes tighilal tighaze: Maaron ighur poia toni iza tiou, ve ighur uraat tonene inim nimag. Ve lolodi poia pa yeru Banabas uraat tiei, ve tighita tighaze yeiŋa uraat tiei ee moghon. Tovenen yeiŋa niwakisin nimamai, ve nimbua saveeŋ nighaze yeru Banabas pale nila nighama uraat ila yes to Yuda maau ne lolodi, ve yes tighama uraat pa yes Yuda.

<sup>10</sup>Mbab ee moghon to tisaav payei tighaze nighami, nene vene: Ye i rau matamai iŋgal tamtothon todi to mbolaŋ igham di, ve nisangoor ledi ulaŋ pida. You naloŋ saveeŋ todi tonowen, ve nayok pani moghon. Pasa, muŋ ve inim, ngar tiou iyaryaŋ naghaze naghama tovene.<sup>t</sup>

### Sawa to Paulus iyaan Petrus

<sup>11</sup>Sawa to Petrus izi inim ndug Antiok, ye ighama ngar to denja maau. Tovenen you nasaav kat ila mata, ve nayaana. <sup>12</sup>Pasa, muŋ, yesŋa yes to Yuda maau ne tiluplup di pa ghanghaniŋ. Eemoghon sawa to Yakobus imbaŋ ndita pida tila tivot todi, Petrus ipul yes to Yuda maau ne, ve yesŋa tilup di muul maau. Pasa, imatughez pa yes to tiyoon ariana pa tutuuŋ to Mose ve ngar to ziroŋ tamtothon.<sup>u</sup>

<sup>13</sup>Ve enŋeni maau. Yuda pida to tighur ila to Yesu, yes tila toman Petrus pa kaarom toni. Ve Banabas paam, tighamun ngar toni le itaghon di pa kaarom todi tonowen.

<sup>14</sup>You naghita ngar todi tonowen iyel kat pa saveeŋ onoon to varu poia. Tovenen nasaav kat pa Petrus ila ival tiina matadi naghaze: “Yom Yuda. Eemoghon upul yes Yuda gabuadi ve tutuuŋ todi, ve unee unumale yes to Yuda maau. Vena to aazne utoor ngar tiom muul, ve ughaze utaghon Yuda gabuadi? Ngar to ughami, nene pale ighama yes to Yuda maau ne matadi iŋgal tighaze yes i rau titaghon yes Yuda gabuadi ve tutuuŋ todi.”<sup>v</sup>

### Tamtothon to ighaze ighur ila to Yesu, ye inee denja ila Maaron mata

<sup>15</sup>Onoon, yes ndug ndug to tikankaan pa Maaron, timamalaŋ pa tutuuŋ toni i rau sawa isob. Ve iit to siŋ to Yuda kat, tagham tovene maau.

---

r 2:6 Mbaŋ 10:34; Ep 6:9 s 2:7 Mbaŋ 22:21; Ro 11:13+ t 2:10 Mbaŋ 11:29+; Ro 15:25; 2Kor 8:1+ u 2:12 Mbaŋ 11:3 v 2:14 1Tim 5:20

<sup>16</sup>Eemoghon iit tawatag: Iŋgar to taghoniinŋ tutuuŋ, nene irau igham tamtoghon eta ineep denŋia ila Maaron mata ne maau. Ghurla toit to inŋarua Yesu Kriŋi, tauto inim ataam pait ve taneep denŋiaad ila Maaron mata. Pughu tonene to iit taghur ila to Yesu Kriŋi, leŋo igham ghiit taneep denŋiaad ila Maaron mata. Ve ataam to taghoniinŋ tutuuŋ, nene tanumeera muul maau. Pasa, tamtoghon eta irau itaghon katin tutuuŋ to Maaron ve ighami ineep denŋia ila Maaron mata ne maau.<sup>w</sup>

<sup>17</sup>Tauto iit tazuarŋa ghiit taghaze le taghur ila kat to Yesu Kriŋi ve taneep tuŋŋia ila toni. Leso ye igham ghiit taneep denŋiaad ila Maaron mata. Onoon, sawa pida, iit tamalaanŋ pa Maaron tutuuŋ toni. Eemoghon pale tasaav vena? Yesu Kriŋi inim pughu pa sosor toit tonowen? Maau kat!<sup>x</sup>

<sup>18</sup>Ve aghita. Ataam to taghoniinŋ tutuuŋ, you napaghazoŋani naghaze nene isob wa. Ighaze natoor ŋgar tiou ve napayoon ataam tonowen muul, nene pale nayel pa Maaron ŋgar toni.<sup>y</sup>

<sup>19</sup>Tovenen ataam to taghoniinŋ tutuuŋ, you napuli wa. Pasa, sawa to Kriŋi imbaad sosor tiou atia izala ai pambarooŋ itaghon saveeŋ to tutuuŋ, nene inimale you paam namaat tomani. Tauto aazne, naneep ila tutuuŋ samba muul maau, ve naghama nepooŋ paghu ila to Maaron ve nambesmbes pani. <sup>20</sup>Tovenen nepooŋ tiou to aazne naghama izi taan, nene taug nanŋini muul maau. Kriŋi to inepneep ila lolog ne, tauto inŋin nepooŋ tiou. Tovenen you naghur ila to Maaron Natu to ighur lolo payou kat, ve ipul tau imaat payou. Ghurla tiou tonene, tauto aazne ighamgham pooz payou pa nepooŋ tiou to taan.<sup>z</sup>

<sup>21</sup>Poia to Maaron to iza toit ila uraat to Yesu Kriŋi, nene irau matag velegini inimale mbeb sorok ne maau. Ighaze ŋgar to taghoniinŋ tutuuŋ irau igham ghiit taneep denŋiaad ila Maaron mata, nene Kriŋi imaat sorok.<sup>a</sup>

### Iŋgar to taghoniinŋ tutuuŋ, nene inim ataam pa yes Galesia ve tigham Avuvu Patabuanŋ ne maau

**3** <sup>1</sup>Aa yam Galesia, agham ŋgar to borouŋa! Sei ighamun ŋgar tiam? Aazne, awaghamgham animale yes to mura tiwaghamun di! Sawa to nineep toman gham, yei nipatoot gham pa Yesu Kriŋi, le inimale taumim aneep, ve aghita tirabi izala ai pambarooŋ.<sup>b</sup>

<sup>2</sup>Yo, naghaze naghason gham pa mbeb eez. Yam agham Maaron Avuvu itaghon sa ataam. Ataam to taghoniinŋ tutuuŋ, ma ataam to alooŋ varu poia ve aghur ila?<sup>c</sup>

---

w 2:16 Mbanŋ 13:38+; Ro 3:20,28; Ga 3:11    x 2:17 Ga 5:16+    y 2:18 Ro 10:4  
z 2:20 Ro 6:6,11, 7:6; 2Kor 5:15    a 2:21 Hib 7:11    b 3:1 1Kor 1:23; Ga 5:7  
c 3:2 Mbanŋ 2:38; Ro 10:16+; Ep 1:13

<sup>3</sup>Yam tonanan lelim ngar maau ne? Papazogi, Maaron Avuvu ipamundigin gham ve agham nepooŋ poia ila toni. Pughu vena to aazne aghaze apasob uraat toni ila taumim tapirimim? <sup>4</sup>Mbeb naol to muuŋ tivotvot payam, tivot payam sorok? Maau!<sup>d</sup>

<sup>5</sup>Ve pughu vena to Maaron irei Avuvu payam, ve ighamgham mbeb gharatooŋadi ila lolomim? Yam ataghon katin tutuuŋ toni, tauto igham ngar tovene payam ne? Maau. Yam alooŋ varu poia moghon, ve aghur ila.

### Abaram ipatooŋ ghiit pa ataam to ghurla

<sup>6</sup>Matamim ingal imuul ila pa Abaram. Maaron aliŋa to timbooda, isaav tovene:

“Abaram ighur ila to Maaron, tauto Maaron ighita ighaze ye ngeu denja.”<sup>e</sup>

<sup>7</sup>Tovenen yam irau awatag aghaze yes to titaghon ataam to ghurla, tauto tinim Abaram ndinatu.<sup>f</sup>

<sup>8</sup>Muuŋ kat, Maaron iwatag: Muri, ndug ndug to Yuda maau, pale tighur ila varu poia ve ghurla todi igham di tineep denjadi ila ye mata. Pasa, Maaron aliŋa to timbooda, isaav tovene: Muuŋ kat, Maaron ivotia varu poia pa Abaram ighaze:

“Yom pale unum ataam pa ndug tisob to taan, leso poia tiou iza todi.”<sup>g</sup>

<sup>9</sup>Tovenen tamtoghon tisob to tighur ila to Krisi, nene poia to Maaron pale iza todi, inimale muuŋ Abaram ighur ila ve poia to Maaron iza toni.<sup>h</sup>

### Ataam to taghoniŋ tutuuŋ, ye le patanjani

<sup>10</sup>Yes to tinumeer ngar to taghoniŋ tutuuŋ tighaze pale inim ataam padi ve tineep denjadi ila Maaron mata, nene pale mbalmbali to Maaron iza todi ve iwaghamun di. Saveeŋa timbooda pataghaaŋ wa:

“Saveeŋ naol to timbooda ila rau to tutuuŋ, yam irau matamim kisin di ve ataghon di le tisob. Ve sei to ighaze itaghon suvuni maau, nene pale mbalmbali to Maaron iza toni, ve iwaghamuni.”<sup>i</sup>

<sup>11</sup>Tovenen tutuuŋ irau inim ataam pa tamtoghon eta ve ineep denja ila Maaron mata ne maau. Nene ineep ghazooŋa wa. Pasa, Maaron aliŋa to timbooda, isaav tovene:

“Tamtoghon to ighaze ighur ila, nene pale ineep denja ila Maaron mata ve igham nepooŋ poia ila toni.”<sup>j</sup>

<sup>12</sup>Eemoghon ataam to taghoniŋ tutuuŋ, nene ngara ite pa ataam to ghurla. Pasa, ataam to taghoniŋ tutuuŋ, nene vene:

**d** 3:4 1Kor 15:2; 2Yo 8    **e** 3:6 Mbnp 15:6; Ro 4:3    **f** 3:7 Yo 8:39; Ro 4:11+

**g** 3:8 Mbnp 12:3, 18:18, 22:18    **h** 3:9 Ro 4:16    **i** 3:10 Lo 27:26    **j** 3:11 Hab 2:4; Ro 1:17; Ga 2:16; Hib 10:38

“Tamtoghon to ighaze itaghton tutuun tiou, nene pale ineep pooi.”<sup>k</sup>  
<sup>13</sup>Tovenen ataam to taghoniin tutuun, nene igham patañani pait. Pasa, ighaze tataghton katin tutuun maau, nene pale mbalmbali to Maaron iza toit ve iwaghamun ghiit. Eemoghon Yesu igham inaad ve imbaad mbalmbali to Maaron izala ai pambaroon. Tauto igham mulin ghiit pa patañani tonowen. Saveeja ineep pataghaan wa:

“Iñgeu to ighaze tirabi ve imonau ila ai, nene pale mbalmbali to Maaron ineep iza toni.”<sup>l</sup>

<sup>14</sup>Krisi igham tovene, leso poia to Maaron to muun ijarua Abaram, iza to yes to Yuda maau ne paam. Tauto aazne, iit to taghur ila to Krisi ne, tagham Maaron Avuvu itaghton saveeja mbuaan toni.<sup>m</sup>

### Tutuun to Maaron irau ireu saveeja mbuaan toni maau

<sup>15</sup>Yam toñvetaz, you naghaze naghama saveeja palelaan pa ngar to iit tamtoghon taghamghami. Ighaze tambua saveeja eta ve tapariaanja le iyaryaaja kat, nene muri tamtoghon ite paam irau ireua, ma iseenge pa saveeja ite paam maau. Pasa, saveeja mbuaan tonenen iyaryaaja wa. <sup>16</sup>Yo, mataad ingal saveeja to muun Maaron imbua toman Abaram ve paghu toni. Saveeja tonowen ijarua tamtoghon tisob to tivot ila to Abaram ne maau. Ijarua ngeu ee moghon, nene Krisi.<sup>n</sup>

<sup>17</sup>Saveeja tiou tonene, pughu tovene: Maaron imbua saveeja toman Abaram, ve ipariaanja le iyaryaaja kat, ve ndaman 430 inim ila, ghoroghon igham tutuun pa yes Israela. Tovenen tutuun irau ireu saveeja mbuaan tonowen maau. Pasa, saveeja mbuaan ivot muun.<sup>o</sup>

<sup>18</sup>Nepoon poia to Maaron ighaze igham pa tamtoghon toni, inimale ngar to taghoniin tutuun irau inim ataam pait ve taghami, tone taghami ila ataam tonenen, ve saveeja mbuaan ineep. Eemoghon maau. Pasa, Maaron imbua saveeja pa Abaram ighaze ye pale igham nepoon poia tonowen pani sorok.<sup>p</sup>

### Pughu to Maaron igham tutuun pait

<sup>19</sup>Venen, pughu vena to Maaron imbua saveeja le isob, ghoroghon izi ve igham tutuun pa yes Israela? Ye igham tutuun pa tamtoghon, leso ipamundigin ngar todi, ve tighilaal sosor todi. Ve ye ighaze tutuun tonowen iyoon le irau Abaram paghu toni to imbua saveeja pani inim ivot. Tutuun tonenen, yes anela tigham pa Mose, ghoroghon ye ana isakia ila pa yes Israela. Pasa, ye to iyoon bodbodaaja pa Maaron ve yes Israela.<sup>q</sup>

<sup>20</sup>Eemoghon sawa to Maaron imbua saveeja toman Abaram, tamtoghon eta, ma anela eta ineep bodbodaaja pa Maaron ve Abaram, ve isakia

---

k 3:12 Wkp 18:5; Ro 10:5    l 3:13 Lo 21:23; Ro 8:3; 2Kor 5:21    m 3:14 Yo 7:38+;  
 Ro 4:16    n 3:16 Mbnp 12:7, 22:18, 24:7    o 3:17 Igham 12:40+    p 3:18 Ro 4:13+, 11:6  
 q 3:19 Yo 1:17; Mbañ 7:38; Ro 5:20, 7:7

Maaron aliņa ila pa Abaram ne maau. Abaram ilooņ saveeņ ila Maaron tau avo. Pasa, Maaron eņgeni to ineep, ve isavia.

<sup>21</sup>Ma vena? Saveeņ mbuaaņ to Maaron iparab toman tutuuņ toni? Maau kat! Inimale tutuuņ eta irau inim ataam pait ve tagham nepooņ poia ila to Maaron, tone nġar to taghoniņ tutuuņ irau igham ghiit taneep denjaad ila Maaron mata. <sup>22</sup>Eemoghon maau. Pasa, Maaron aliņa to timbooda, isaav ghazooņa tovene: Ņġar samia ikis ghiit tasob, le tanimale yes to tineep ila ruum to yabyabuņ lolo. Saveeņ tonene ipaghazoņan ghiit pa sosor toit. Leso taghur ila to Yesu Kriši, ve ghurla toit inim ataam pait ve taghita saveeņ mbuaaņ to Maaron anoņa.<sup>r</sup>

<sup>23</sup>Muuņ, sawa to taneep ila tutuuņ samba, nepooņ toit inimale yes to tineep ila ruum to yabyabuņ lolo. Pasa, tutuuņ iņġin ghiit pa mbep tisob. Taneep tovene le Maaron ipatooņ ataam to ghurla ivot ighazooņ.<sup>s</sup>

<sup>24</sup>Agham nġar pa yes mbesooņa to tiņġin ndipain ve tipasalunġan di le tinim ndolman.<sup>t</sup>

Muuņ, iit taneep ila tutuuņ samba ve tutuuņ iņġin ghiit inimale yes mbesooņa tonowen le Kriši inim ivot. Leso ighereb ghiit tala to Kriši ve taghur ila toni, ve ye igham ghiit taneep denjaad ila Maaron mata.<sup>u</sup>

<sup>25</sup>Ve aazne, ataam to ghurla ivot ighazooņ wa. Tauto taneep ila tutuuņ samba muul maau, ve tutuuņ inim patoņaaņ pait muul maau.<sup>v</sup>

### Yes to tighur ila to Kriši tinim Maaron ndinatu

<sup>26</sup>Yam asob to aghur ila to Yesu Kriši, Maaron ndinatu yam.<sup>w</sup>

<sup>27</sup>Pasa, yam to agham ya ve anim Kriši le, asob agham nġar to Kriši inim lemim wa, inimale andud gham pa nonoġiņa paghu.<sup>x</sup>

<sup>28</sup>Ve yam asob raratemim ila Maaron mata. Ighaze yam Yuda, ma Yuda maau, ma yam mbesooņa sorok, ma yam mbesooņa maau ve aņġin taumim, ma yam ndiliva, ma nditamoot, mbep naol tovene, iit tagham nġar pani malep. Pasa, yam aneep ila to Yesu Kriši, ve ye ilup gham asob anim ee moghon wa.<sup>y</sup>

<sup>29</sup>Tovenen aazne, yam anim Kriši le wa. Ve anim Abaram papaghu toni paam. Tauto izamim pa ghamuuņ nepooņ poia ila to Maaron, itaghon saveeņ mbuaaņ to muuņ ye imbua toman Abaram.<sup>z</sup>

---

r 3:22 Mbo 14:3; Ro 3:9+ s 3:23 Ga 4:3; Hib 9:10 t 3:24 Yes Grika ledi mbesooņa pida to tiņġin ndinatudi. Yes mbesooņa tonowen tilaghlaagh toman yes ndipain ve tipatoot di pa nġar popoia le tinim ndolman. Ghoru tipul di, ve ndipain tonowen tiņġin taudi.

u 3:24 Mbaņ 13:39 v 3:25 Ro 7:6, 10:4; Kol 2:16+; Hib 8:13 w 3:26 Yo 1:12; Ro 8:14+ x 3:27 Ro 13:14; Kol 3:12 y 3:28 Yo 10:16; 1Kor 12:13; Kol 3:11 z 3:29 Mbnp 21:12; Ro 9:7+



### Iit tanim mbesooŋa pa tutuuŋ muul maau.

**4**<sup>1-2</sup> Saveeŋ tiou tonene, pughu tovene: Ighaze tamtoŋhon eta iza pa iŋgin mbeb tisob to tama, nene irau iŋgin mbeb tonenen rikia maau. Sawa to ye paini, taghita taghaze nepooŋ toni, nene ilib pa yes mbesooŋa to tama maau. Pasa, ye ineeŋ ila mbesooŋa pida sambadi, ve tingini toman mbeb toni tonowen. Ve ye pale ineeŋ tovene le tiza pa sawa to tama ighuri, ghoru igham mbeb toni tonenen, ve tau iŋgin di. <sup>3</sup>Yei Yuda tovene paam. Muuŋ, nineeŋ ninimale yes ndipain to tipatoot di pa ŋgar. Sawa tonenen, nimbessmbees pa tutuuŋ naol to tisavia mbeb to taan.<sup>a b</sup>

<sup>4</sup>Nineeŋ tovene le niza pa sawa kat to Maaron ighuri, ghoru imbaaŋ tau Natu izi inim taan. Liva eez to taan ipoopa. Ve ye ineeŋ ila tutuuŋ samba, ve itaghon katin tutuuŋ le isob.<sup>c</sup>

<sup>5</sup>Ye inim pa igham mulin yei to nineeŋ ila tutuuŋ samba. Leso ninim mbesooŋa sorok pa tutuuŋ muul sob, ve ninim Maaron ndinatu.<sup>d</sup>

<sup>6</sup>Ve yam paam, anim Maaron ndinatu wa. Tauto Maaron imbaaŋ Natu Avuvu ila lolomim. Avuvu tonowen igham ghiit tapoi Maaron taghaze: “Abba, tamaŋ!”<sup>e</sup>

<sup>7</sup>Tovenen aazne, yam anim mbesooŋa sorok muul maau. Pasa, Maaron igham gham anim ye tau ndinatu wa. Ve ighaze ye ndinatu yam, ghoru izamim pa ghamuuŋ nepooŋ poia ila toni.<sup>f</sup>

### Paulus lolo imbumbu pa yes Galesia

<sup>8</sup>Muuŋ, yam awatag Maaron maau. Sawa tonenen, yam anim mbesooŋa sorok pa mbeb soroksorok naol to Maaron tau maau.<sup>g</sup>

<sup>9</sup>Eemoghon aazne, yam awatag Maaron wa. Aiss, nasaav vene malep. Maaron to iwatag gham ve igham gham anim le wa. Tovenen pughu vena to aazne yam apul murimim pani, ve aghaze amuul pa gabuamim muŋgina, ve ataghon tutuuŋ naol to taan to ledi tapiridi irau to tiuul gham ne maau?<sup>h</sup> <sup>10</sup>Aazne, yam matamim ingalŋgal sawa to kaiyo iza paghu, ve sawa to ndaman paghu, ve sawa pida to aghur di tinim sawa to sunjuuŋ itaghon ŋgar to yes Yuda.<sup>i</sup>

<sup>11</sup>Tauto agham ghou lolog imbumbu pa uraat tiina to naghami ila lolomim. Pale ighur anoŋa, ma inim mbeb sorok?

---

**a 4:3** Ataam ite to tator saveeŋ waaro tonene, nene vene: “Sawa tonenen, taneep tanimale mbesooŋa sorok pa avuvu samsamiadi to tingin mbeb pida to sambam ve taan.”  
**b 4:3** Ga 3:23   **c 4:4** Mt 5:17; Yo 1:14   **d 4:5** Yo 1:12; Ro 8:14+; Ga 3:13; 1Pe 1:18+  
**e 4:6** Ndipain to Israel tiwatwaat nditamandi ila taudi aliŋjadi tighaze ‘Abba’ inimale ndipain toit tighaze ‘tamaŋ’ o ‘amaŋ.’   **f 4:7** Ro 8:17; Ga 3:29   **g 4:8** 1Kor 8:4+, 12:2  
**h 4:9** Ataam ite to tator saveeŋ waaro tonene, nene vene: “Tovenen pughu vena to aazne, yam apul murimim pani, ve aghaze amuul pa gabuamim muŋgina, ve anim mbesooŋa pa avuvu pida to ledi tapiridi irau to tiuul gham maau?”   **i 4:10** Kol 2:16,20; Hib 7:18

### Paulus itaŋ roran yes Galesia

<sup>12-13</sup>Yam toŋvetaz, aghita. You napul ataam to taghoniin tutuun, ve nataghon yam to Yuda maau ne pa gabuamim. Tovenen aazne, nataŋ roran gham naghaze atoor ŋgar tiam, ve amuul anim ataghon ghou pa ŋgar to you naghhamghami. Saveeŋ tiou tonene, nasavia pasa naghaze yam agham sosor payou, nene maau. Yam awatag: Sawa to nalat ve navotia varu poia payam muun, you namorooŋ. Tauto nazalat naneep toman gham.<sup>j</sup>

<sup>14</sup>Moroghoon tiou igham pataŋani tiina payam. Eemoghon matamim velegin ghou, ma azurun ghou maau. Yam apakur ghou kat, inimale you aŋela eta to Maaron, ma Yesu Krisi tau. <sup>15</sup>Sawa tonenen, yam tinimim iza kat pa poia to Maaron to iza tiam. Eemoghon aazne, tinimim iza muul maau. Nene vena? Onoon kat, you nasaav payam: Sawa tonenen, lolomim pa auul ghou kat. Irau aŋguruut mbeb eta payou maau. Inimale yam irau auul ghou pa matamim, tone apasi ve agham payou! <sup>16</sup>Vena, you nasavia saveeŋ onoon payam, tauto aghaze naghur koi payam?

<sup>17</sup>Ndiran to tizuarua di pa ghamuun lolomim, ŋgar todi poia maau. Yes tighaze tigham gham apul ghou, leso ataghon di pa ŋgar todi. <sup>18</sup>Sawa isob, ighaze tazuarua ghiit pa ghamuun ŋgar popoia, nene poia. Tovenen sawa to naneep toman gham maau, yam irau matamim kisin ŋgar poia ve ataghoŋi. <sup>19</sup>O ndinatug, ŋgar to aghami, nene igham pataŋani tiina payou muul. You nanimale liva to apo iyabyab pa popaŋ. Ve you pale nambaad pataŋani tonene le irau ŋgar to Krisi ivot inim tiina ila lolomim.<sup>k</sup>

<sup>20</sup>Oyai, pale naghama vena payam? Aazne, naneep mala payam. Inimale itija taneep, tone yam agham saveeŋ ila taug avog, ve nasavia saveeŋ popoia pida pa nauul ŋgar tiam.

### Saveeŋ palelaaŋ to Agar ve Sara

<sup>21</sup>Yam to aghaze aneep ila tutuun samba, asaav payou lak. Yam aloon saveeŋ to tutuun, ma maau? <sup>22</sup>Pasa, Maaron aliŋa to timbooda, isaav tovene: Abaram ndinatu ru. Eez ivot ila to Agar, ye liva to mbesooŋa sorok. Ve ite ivot ila to azuwa Sara to ruum tau.<sup>l</sup>

<sup>23</sup>Liva mbesooŋa natu, ye ivot itaghon ataam to iit tamtoghon to taan. Ve liva to mbesooŋa maau ne natu, ye ivot itaghon saveeŋ mbuaŋ to Maaron.<sup>m</sup>

<sup>24</sup>Saveeŋ tonene, nene saveeŋ palelaaŋ. Pasa, ndiliva ru tonowen tipatoon ghiit pa ataam ru to tamtoghon titaghon di leso yesŋa Maaron tilup di tinim ee moghon. Agar, ye inimale ataam to tutuun to ivot izi

---

j 4:12-13 1Kor 2:3 k 4:19 Ro 8:29; 1Kor 4:15 l 4:22 Mbnp 16:15, 21:2  
m 4:23 Mbnp 17:16+, 18:10+; Ro 9:7+; Hib 11:11

lolooz Sinai. Yes to titaghon ataam tonowen, tineep tinimale mbesooņa sorok. <sup>25</sup>Lolooz Sinai, nene ineep taan suruvu to Arabia. Agar, ye inimale lolooz tonowen ve ndug Yerusalem to aazne ineep izi taan. Pasa, ndug tonowen tamtoghona tinim mbesooņa sorok pa tutuuņ. <sup>26</sup>Eemoghon Yerusalem tau to ineep izi sambam, tamtoghona tinim mbesooņa sorok maau. Yes ndug tau. Yerusalem tonowen, to inim iit tinaan.<sup>n</sup>

<sup>27</sup>Pasa, Maaron aliņa to timbooda, isaav ighaze:

“Yom liva to upoop maau, tinim iza!

Yom liva to uyamaan yabyabuuj pa popaaj sone, lolom poia ve aliņam iza!

Pasa, liva to azuwa ipul muri pani, nene pale ndinatu katindi ve tilib pa liva to ye le azuwa ne ndinatu.”<sup>o p</sup>

<sup>28</sup>Yam toņvetaz, yam animale Sara natu Isak. Pasa, saveeņ mbuaaņ to Maaron inim ataam payam ve anim ye tau ndinatu.<sup>q</sup>

<sup>29</sup>Ve matamim iņgal imuul ila pa ņgar to muuņ Ismael igham pa Isak. ņgeu to ivot itaghon ataam to iit tamtoghon to taan, ye ighur pataņani pa tazi to ivot ila Maaron Avuvu tapiri. Aazne, ņgar raraate ivotvot. Pasa, yes to titaghon ataam to tutuuņ, tighurghur pataņani pa iit to Maaron Avuvu igham ghiit tanim ye tau ndinatu.<sup>r</sup>

<sup>30</sup>Ve Maaron aliņa to timbooda, isaav vena? Isaav tovene:

“Uzurun liva mbesooņa yesuru natu tila sagan! Pasa, liva mbesooņa natu irau ineep toman liva to ruum tau ne natu, ve yesuru tiyoon pa mbep to tamandi ne maau.”<sup>s</sup>

<sup>31</sup>Tovenen yam toņvetaz, alooņ. Iit liva mbesooņa ndinatu maau. Iit tinaan, ye ruum tau.<sup>t</sup>

### Tamtoghon to Krisi tinim mbesooņa pa tutuuņ maau

**5** <sup>1</sup>Tovenen iit tanim mbesooņa pa tutuuņ muul maau. Pasa, Krisi ipas ghiit pa ataam to taghoniņ tutuuņ wa. Tovenen ayoon ariņa. Apul tamtoghon tigham gham anim mbesooņa muul malep.<sup>u</sup>

<sup>2</sup>Alooņ. You Paulus nasaav ghazooņa payam tovene: Ighaze alooņ ndiran tonanan aliņadi, ve tizir gham leso aneep denjamim ila Maaron mata, nene irau uraat to Krisi iuul gham maau. Maau kat. <sup>3</sup>You nasaav ghazooņa payam muul. Yam asob to aghaze ataghon ataam to tutuuņ ve

---

**n 4:26** Ro 8:15; Hib 12:22; Syg 21:2,10    **o 4:27** Muuņ, lupuuņ to yes Israela toman Maaron poia. Eemoghon yes ival maau. Sawa tonenen, yes tineep tinimale liva to ye le azuwa. Eemoghon sawa naol, tizoor Maaron aliņa. Tovenen muri, ye ipul muri padi, ve ipul di tila yes Babilona ve ndug pida nimadi. Sawa tonenen, yes tineep tinimale liva to ipoop maau, ve azuwa ipuli. Aazne, ila uraat to Krisi, Maaron igham ival tiina to ndug ndug tinim ndinatu. Yes Yuda, ve yes to Yuda maau ne paam. Yes to tinim Yerusalem to sambam ndinatu.    **p 4:27** Is 54:1    **q 4:28** Ro 9:8    **r 4:29** Mbnp 21:9; Ga 5:11, 6:12    **s 4:30** Mbnp 21:10; Yo 8:35    **t 4:31** Ga 3:29, 5:1,13    **u 5:1** Yo 8:36; Ro 7:6, 8:2+

ayok pa tizir gham, yam irau ataghton tutuuŋ to naol ne le isob, ghoru aneep denjamim ila Maaron mata.<sup>v</sup>

<sup>4</sup>Tovenen yam to anumeer ŋgar to taghoniin tutuuŋ pa igham gham aneep denjamim ila Maaron mata, apatum gham. Pasa, yam arab motin taumim pa Krisi ve apul poia to Maaron wa.<sup>w</sup>

<sup>5</sup>Eemoghon iit to taghur ila to Krisi, Maaron Avuvu ipapalot ghiit ve tasasajan sawa to Maaron ipatoon ghiit ighaze iit taneep denjaad ila mata. Mbeb tonowen, tauto taghur mataad pani kat.<sup>x</sup>

<sup>6</sup>Iit to taneep ila to Yesu Krisi, tagham ŋgar tiina pa ŋgar to ziroon tamtooghon muul maau. Pasa, ighaze tizir ghiit, ma tizir ghiit maau, nene mbeb to uliid moghon. Ve ighaze ghurla toit ipamundigin ghiit le lolood pa tamtooghon ve tagham poian di, nene mbeb tau.<sup>y</sup>

<sup>7-8</sup>Muun, yam alaan denja ve ataghton ataam to saveen onoon. Aazne, sei iponpooon gham pa landoon tiam? Saveen ŋgoreen todi to ighamun ŋgar tiam, nene inim pa Maaron to ipoi gham anim le ne maau.<sup>z</sup>

<sup>9</sup>Tovenen apatum gham. “Pasa, yis ŋgiira moghon, nene irau igham palawa tiina isar.”<sup>a</sup>

<sup>10</sup>Eemoghon you naghur ila to Maaron naghaze ye tau pale ipasalungan gham, leso ataghton ŋgar toni animale you. You nakankaan pa sei to ighamun ŋgar tiam. Eemoghon ŋgeu tonanan pale igham atia to sosor toni tonowen.

<sup>11</sup>Yam toŋvetaz, you nawatag. Ndiran pida tingalŋgal saveen kaarom payou tighaze you taug navovotia saveen pa tamtooghon naghaze yes irau titaghton tutuuŋ to Mose ve tizir di, ghoru poia. Laak, ighaze saveen todi tonowen onoon, pughu vena to yes Yuda tighurghur patajanani payou sone? Inimale naghaham tovene, tone saveen to navovotia pa mateen to Yesu izala ai pambaroon, irau ireu tamtooghon lolodi muul maau.<sup>b</sup>

<sup>12</sup>Yes to tighamun ŋgar tiam ve tiyaryaan pa ziroon gham, you naghaze tipaal taudi lambedi paam, ghoru poia!

### **Ŋgar to lolood mungina ve ŋgar to Avuvu Patabuan lolo pani tipaparab**

<sup>13</sup>Yam toŋvetaz, Maaron ipoi gham anim le, leso anim mbesoonja pa tutuuŋ muul sob. Eemoghon ŋgar tonenen inim pughu payam pa ataghton ŋgar to lolomim mungina malep. Yam irau lolomim pa taumim, ve awaulan gham.<sup>c</sup>

<sup>14</sup>Pasa, tutuuŋ tisob tineep ila tutuuŋ ee moghon tonene lolo: “Lolom pa tamtooghon ve ugham poian di, animale lolom pa taum.”<sup>d</sup>

<sup>15</sup>Eemoghon ighaze yam awazoran gham ve avomim iwaghanin gham animale ŋgavuun sagsag to tiparab ve tiwaghanin di, ghoru apatum gham. Pa vene, anoknoki tovene, ve awaghamun taumim le asami kat.

---

v 5:3 Ro 2:25; Ga 3:10 w 5:4 Ga 2:21 x 5:5 Ro 8:23+; 2Tim 4:8 y 5:6 1Kor 7:19; Ga 6:15; Kol 3:11 z 5:7-8 1Kor 9:24; Ga 1:6, 3:1 a 5:9 1Kor 5:6 b 5:11 1Kor 1:23; Ga 6:12 c 5:13 1Kor 8:9; 1Pe 2:16 d 5:14 Mt 22:37+; Ro 13:8+; Yems 2:8

<sup>16</sup>Tovenen you nasaav payam: Laghoonj tiam, yam irau ataghon ngar to Maaron Avuvu. Ighaze agham tovene, nene irau ataghon lolomim muᅇgina muul maau.<sup>e</sup>

<sup>17</sup>Aghita. Sawa isob, ngar to lolood muᅇgina ve Maaron Avuvu tiwaghurun koi pa taudi ve tipaparab. Pasa, ngar to Maaron Avuvu lolo pani, nene lolood muᅇgina izorzoora. Ve ngar to lolood muᅇgina iyaryaaj pani, nene paam Maaron Avuvu izorzoora. Tauto sa ngar to aghaze aghami, yam irau aghami maau.<sup>f</sup>

<sup>18</sup>Eemoghon ighaze ataghon pooz to Maaron Avuvu, nene pale aneep ila tutuunj samba muul maau.<sup>g</sup>

### ᅇgar to lolood muᅇgina

<sup>19</sup>ᅇgar to lolood muᅇgina ipapazaagh ghiit pani, iit tawatagi wa. Nene ngar tovene: Taghur maat, tagham ngar to ngalaanja maau, lolood ipazaagh ghiit pa ngar samsamia ve tala pa naghood moghon,<sup>h</sup>

<sup>20</sup>tambees pa maaron kaaromnja, ngar to ghamuunj mur, taghur koi pa tamtoghon, tawazoran ghiit, taghur koi pa nditaad to ledi mbeb katindi, ateed izaza pa malmal rikia, takokook, mataad ingalngal tauud moghon, tavalg ghiit taneep leed leed, tagham ngar taghaze lupuunj toit moghon to denja kat ila Maaron mata, <sup>21</sup>lolood igham pa mbeb to nditaad, taghun le tasami, itinja nditaad talup ghiit ve tagham ngar samsamia naol toman oroor tiina, ve ngar samsamia pida paam. Saveej to muunj nasavia payam, tauto aazne nasavia muul: Ndiran to titaghon ngar tovene, yes irau tigham nepoonj poia izi Maaron ndug toni maau. Pasa, yes titaghon pooz toni maau.<sup>i</sup>

### ᅇgar to Maaron Avuvu ipapamundigin ghiit pani

<sup>22</sup>Ve Maaron Avuvu ipapamundigin ghiit pa ghamuunj ngar tovene: Lolood pa tamtoghon ve tagham poian di, lolood poia kat irau sawa isob, tapatoonj ngar luuma pa tamtoghon ve itinja talup ghiit tanim ee moghon, tatatan ateed, tagham poian tamtoghon ve tapatoonj ngar popoia moghon padi, mataad ingal saveej mbuaaj toit ve tataghoni,<sup>j</sup>

<sup>23</sup>tagham pooi pa tamtoghon, ve tanjin tauud pooi. Aghita. ᅇgar tovene, nene denja moghon. Tutuunj eta ingalsekin ghiit pani maau.<sup>k</sup>

<sup>24</sup>Yes to tinim Yesu Krisi le, tigham lolodi muᅇgina toman ngar samsamia naol to lolodi muᅇgina ipapazaagh di pani ne, ve tirab di tizala ai pambaroonj ve timaat wa.<sup>l</sup>

e 5:16 Ro 8:4+, 13:14; 1Pe 2:11 f 5:17 Ro 7:15+, 8:6+ g 5:18 Ro 6:14, 8:2,14

h 5:19 Ro 13:13+; Ep 5:3+ i 5:21 1Kor 6:9; Syg 22:15 j 5:22 Ep 5:9; Kol 3:12

k 5:23 Ro 3:31; 1Tim 1:9 l 5:24 Ro 6:6; Ga 2:20; Kol 3:5

<sup>25</sup>Iit tagham nepoon paghu ila to Maaron Avuvu wa. Tovenen laghoon toit, iit irau tataghon pooz to Maaron Avuvu.<sup>m</sup>

<sup>26</sup>Tovenen tapait tauud malep. Ve taparai nditaad, ve taghur koi pa yes to ledi mbeg katindi ne malep.<sup>n</sup>

### Tapatoon ngar poia pa tamtoghon

**6** <sup>1</sup>Yam tonvetaz, ighaze tamtoghon eta itap ve igham sosor, yam to ataghon ngar to Maaron Avuvu, ala apasalungani toman saveerj luuma, lesu itoor ngar toni imuul ila pa Krisi. Eemoghon apatum gham. Pa vene, tovaaj ivot payam paam.<sup>o</sup>

<sup>2</sup>Awaulan gham pa badoon patajani tiam. Lesu apatoonj tutuunj to Krisi anoja ivot.<sup>p</sup>

<sup>3</sup>Ighaze ngeu eta ighaze ye ilib pa ndita, nene itomba tau. Pasa, tamtoghon tovene, ye igham ngar iraua sone.<sup>q</sup>

<sup>4</sup>Tovenen tamtoghon enaenja irau tingabiiz poian uraat to yes taudi: Uraat todi poia ila Maaron mata, ma maau? Ighaze uraat todi poia, nene yes irau tinidi iza pani. Ve tingabiiz uraat todi toman uraat to nditadi malep.

<sup>5</sup>Pasa, iit enaenja irau tambaad patajani toit toit.

### Sa ngar to ighaze taghami, muri pale tagham anoja toni

<sup>6</sup>Ighaze tamtoghon eta ipatoot gham pa Maaron aliija, yam irau arei mbeg tiam popoia pida pani paam.<sup>r</sup>

<sup>7</sup>Apatum gham. Irau atomba Maaron maau. Sa aniij to ighaze tavazogi, nene aniij tonenen moghon to pale iza ve tatai.<sup>s</sup>

<sup>8</sup>Tamtoghon to ighaze ivavazog mbeg to ipazaagh lolo mungina, nene pale ighita anoja tovene: Ye pale isami ve ilale. Ve tamtoghon to ighaze ivazog mbeg to ipariaanj ngar to Maaron Avuvu ila lolo, nene pale ighita anoja poia tovene: Ye pale igham nepoon poia ila to Maaron Avuvu itaghooni taghooni gha ila.<sup>t</sup>

<sup>9</sup>Tiniid imum pa ghamuunj ngar poia malep. Pasa ighaze tapuli maau, ve tanoknok ghamuunji, nene pale taghita anoja ila sawa toni.<sup>u</sup>

<sup>10</sup>Tovenen ighaze iit irau tauul tamtoghon eta, ghoru tauuli. Iit irau tagham poian tamtoghon tisob. Ve yes to tighur ila to Krisi, ghoru tagham poian di kat. Pasa, yes tinim tonvetaz toit.<sup>v</sup>

### Mateenj to Krisi izala ai pambaroonj, nene mbeg tau

<sup>11</sup>Aghita bodeenj tintina to nambood di pa taug nimag ne. <sup>12</sup>Yes to tizoorndug payam pa taghoonii tutuunj ve tighaze tizir gham, nene

---

**m** 5:25 Ro 8:4,12   **n** 5:26 Ro 12:10+; Pil 2:3   **o** 6:1 Mt 18:15; 2Tim 2:25; Yems 5:19+  
**p** 6:2 Yo 13:34; Ro 15:1   **q** 6:3 Ro 12:3; 1Kor 3:18, 8:2   **r** 6:6 1Kor 9:7,11,14  
**s** 6:7 Ro 2:6; 1Kor 6:9; 2Kor 9:6   **t** 6:8 Ro 8:13; Yems 3:18   **u** 6:9 1Kor 15:58; 2Tes 3:13;  
Hib 10:36   **v** 6:10 Ep 2:19; 1Tes 5:15; 1Tim 6:18; 2Pe 1:7

tigham pa izadi moghon. Ve timatughez paam: Ighaze tivotia saveeŋ pa mateeŋ to Kriŋi izala ai pambarooŋ, nene pale yes to tighur ila maau tighur patañani padi.<sup>w</sup>

<sup>13</sup>Yes to tiyoon ariaja pa ŋgar to zirooŋ tamtoghon, taudi titaghon katin tutuuŋ to Mose maau. Yes tizoornug tighaze tizir gham pasa, tighaze tigham gham ataghon ŋgar todi. Leso tipait taudi izadi.

<sup>14</sup>Eemoghon you irau napait taug izag, ma tamtoghon ite paam iza ne maau. Yesu Kriŋi to imaat izala ai pambarooŋ, ye moghon to igham ghou tinig iza ve napait iza. You naghita naghaze sawa to Kriŋi imaat izala ai pambarooŋ, tirab ghou namaat tomani. Tauto mateeŋ toni tapiri irab matin ŋgar to taan to muuŋ ineeŋ ila lolog, ve imaat wa.<sup>x</sup>

<sup>15</sup>Tovenen ighaze tizir ghiit, ma tizir ghiit maau, nene mbeb sorok. Uraat to Maaron to igham ghiit tanim paghu, mbeb tonene moghon to mbeb tau.<sup>y</sup>

<sup>16</sup>Tamtoghon tisob to titaghon ataam tovene, Maaron tau pale lolo isamin di, ve ighur luuma toni iza todi. Pasa, yes to tinim Israela kat.

<sup>17</sup>Yo, you naghaze napasob saveeŋ tiou. Aazne ve ila, lolog pa tamtoghon eta igham patañani payou muul malep. Pasa, sip to ineeŋ ila tinig, nene naghama di pa Yesu Kriŋi iza.<sup>z</sup>

<sup>18</sup>Yam toŋvetaz, poia to Tiina toit Yesu Kriŋi ineeŋ toman gham. Onoon.

---

w 6:12 Ga 5:11; Pil 3:18 x 6:14 Ro 6:6; 1Kor 1:31, 2:2; Pil 3:7+ y 6:15 Yo 3:3; Ro 2:28; 2Kor 5:17; Ga 5:6 z 6:17 2Kor 4:10, 11:23